



Jahresbericht 2014

Ueses nöie Vereinsjahr het wie geng, nach dr erschte Vorstandssitzig, mit em Verträge vor Oschterbscherig agfange, So si mir Vorstandsfroue gäge Ranflüh- iche ids Bärau- Langnau- über Grosshöchstette- gäge Beitenwil- Oberdiessbach- Münsingen über Riggisberg, ueche bis uf Schwarzenburg, mit eme Oschtergrüessli ungerwägs gsi u hi so üsne Gmeinsbürger wo äbe usswärts wohne, e Fröid chönne mache.

Aendi April hi mir s üs de im Vorstand lah guet gah- mir hei ds Vorstandssässe im Kemmeribode dörfe gniesse.

Am 6. Mai si mir chli uf Wätter-Risiko gange u hi dr Maibummel agseit. 17 Froue hi dr Wäg gäge Chonolfinge zum aute Bäre, unger d Füess gno. Dert hi mir de Zyt gha d Sonderusstellig "150 Jahr Isebahn Chonolfinge" a z luege. Dass es da nid nume um d Bahn gange isch, hi die gmerkt, wo afe grad mit em Fritz i Chäuer si ga Brönnts degustiere...mir hie aber o e huffe Grätschafte, Chleider, Büecher u Alltagsgägeständ gesh, wo mir zum teil ja o no kennt hei (de merkt me de aube dass me o chli elter wird..) Trudi u Fritz hi üs jewile die nötige Infos derzue verzellt. Ir historische Chuchi hi mir üs mit Kafi u Chueche für e Heiwäg gstercht .

Wucheplatzbörse heisst üses Projekt wo mir im Juni gstartet hei. Das heisst mir wette motivierte Jugendliche, ab 12 jährig, vo Zäziwil u Mirchel d Möglichkeit gäh es "Tschöppli" z finge i däm dass mir si witer vermittele, sigs für s wüsche, kömmerle oder Chinder hüete etc. Dr Froueverein fungiert da aber nume aus Vermittler. Mir hi so, scho paar Kontakte chönne witergäh.

"Lust und Laster" nennt sich die Stadtfüehrig vo Bärn, wo mir (leider) nume 9 Froue resp. ei Ma, am 20.Juni hi dörfe mitmache. D Frou Hutzli het üs am Bahnhof empfangen u de uf e humorvolli, luschtigi u sehr lehrriichi Art a da de wunderschöne Hüser verbi, bis ache zum Münschter gfüehrt. So si mir mit de Ouge vo Turischte dür üsi wunderschöni Heimatstadt gloffe u hi viu erfahre was sie früecher so triebe hei z Bärn inne....

Dä wunderschöne Summerabe hi mir de uf dr Terrasse vom alte Tramdepot bim feine Znacht lah usklinge u derzu de Bäre, im Bärepark, chönne zuegluege .

Am 8. Juli si mir paar Vorstandsfroue bi strömendem Räge gah d Seniorereis rekognosziere .

Meh Wätterglück hi mir am 20.Ougschte gha. 24 Froue hi uf em Dampfschiff Blüemlisalp während ere Aberundfahrt uf em Thunersee, herrlich fein gässe u derzue Zyt gha zum laffere. Nid nume uf em Schiff si mir ids schwitze cho, nei oder See isch äüä no sehr warm gsi, ömu a däm extrem liecht bekleidet Maa a, wo z Oberhofe im Adamskostüm isch gah bade.

Ohni grosse Wällegang sie mir de ume z Thun acho, hi üs zum teil no e Schlummi gönnt u si de mit em Zügli ume heigreiset.

Mit zwe Care voll reiseluschtige Seniore isch es am 2. September richtig „Länder“ iche. Z Hasle hi mir gäge Heiligchrüz ueche abgha, zur wunderschöne Wahlfahrtschiuche. D Bise het üs ds Ussicht gniesse leider lah verdriesse drum si mir nachere churze, fasch scho amüsante Andacht, gärn ume i Car igstiege u hi d Fahrt dür ds Luzärnerland gnosse. Im Gastof zum Ochse ds Geiss, het üs es feins Zvieri –Znacht erwartet u bime prächtige Sunneungergang si mir 80 Persone, aui ume guet hei chauffiert worde. D Kollekte wo ir Chiuche isch zäme cho, hei mir us aktuellem Grund de unwätterschädigte Aemmitaler la zu choh. Die Kollekte si de o poschtwändend ganz härzlich verdankt worde.

Nach feiner Kürbissuppe u früsche Oepfuchüechli hets am 13. September bir Brockestube resp. Turnhalle gschmöckt. Zum 2. Mal hi mir zum Herbstgnuss iglade u dä hür mit eme Tusch - u Gänggelimärit für d Schuelching kombiniert. Es isch veiechli Märitstimmig ufcho, wo die Ching uf ihrne Dechine ihri Spielsache hei abote. Es jedes vo ihne het de vo üs no e Hot-Dog u es Getränk übercho. Ds Bibliothek-Team het die Glägeheit o benützt für die führungre Büecher unger d Lüt z bringe u bi üs ir Brocki hets o grad ume vii Platz gäh. Mir hi de bschlosse dr Reinerlös vo däm Anlass o no uf ds Konto Unwätter Aemmital i z zahle.

D Brächete isch o hür wieder dr bescht Brockestube-Tag gsi. A der Stell danke mir de freiwillige Hälferinne, wo üs a dene zwene Anläss so super ungerstützt hei.

Am 14. Oktober hi mir de z wohlverdiente Brockiässe im Bäre z Sumiswald dörfe gniesse u derzu mit vii Glächter, nöi Plän u Idee schmiede.

O hür hi mir Pousemilch usgschäicht. Wäg eme Zahnarzttermin z Zäziwil scho am 3. u de z Mirchel am 4. Novämber. Ir ganze Schwiz si so 365000 Bächer Milch vo de Landfroue usgschäicht worde.

D Wiehnachtsbscherig im Name vor Gmeind Zäziwil, hi mir mit freiwillige Hälferinne ändi Novämber usgfuehrt u so o wieder viune Lüt dörfe e Fröid mache u mängs guets Gspräch fuehre.

Mit eme Car voll warm agleiti Froue si mir am 5. Dezämber nach Bremgarte im Aargau greiset. Mir hi dert der wunderschön Wiehnachtsmärit bsuecht. I däm schöne aute Stedtli ar Reuss hie mir 270 Märitständ chönne bewundere. O dr kulinarisch Teil isch nid z churz cho...I glube dä Usflug het o die letschte chönne i Wiehnachtsstimmig versetze...

Ueser Ouge so richtig zum lüchte brunge, hi de d Mirchu-Ungerschüeler wo si am 11. Dezämber ar Seniorewiehnachte si ufräte. Si hi aus gäh bim Singe u Gschicht verzelle u so richtig üser Härz erfröit. Nachem Schätzspiel, Zvieri ässe u Lieder singe isch dä Namitag ume wie im Chutt. D Kollekte hei mir de hür dr Schuel Mirchel lah zu cho- o si wärde bi de Sparmassnahme vom Kanton nid verschont u si drum froh über so e Zuestupf.

Ds Senioreässe fingt mittlerwile scho fasch 2 Jahr im Bahnhöfli statt. Soviu mir mitüberchöme isch das Tschüppeli geng sehr z friede mit em Aesse. Platz hätte sicher aber no meh...

Bim Erarbeite vo de erschte regionale Senioreferie, wo hür im Tessin wärde stattfinge, sie mir aus 2-er Delegation derbi gsi. Mir hei bschlosse mit 400.-Franke hälfe öppis a de Choschtegarantie z leischte. Sehr froh si mir, dass o öpper us üsem Verein im Betreuerteam derbi isch. Es isch das d Annarös Poschung.

Nachem Bschluss vor letschte Houptversammlig, dass mir ds 50-jährige Vereinsjubiläum wöue fiire, hi mir de afe d Fuehler usstrecke u i zwo rep. drei Sitzige es Konzept entworfe. Das aues isch schwär abhängig gsi ob, wie u vorauem wenn d Turnhalle saniert wird. So hi mir de ändi letscht Summer Bscheid übercho, dass mir d Halle im März no dörfe benütze. Für dr Ufwand möglichscht gring z bhauete hei mir üs uf e 14. März geeiniget, so chö mir zum Teil d Inrastruktur vom Musikkonzärt, wo e Wuche vorhär stattfingt, bruche. Mir hoffe, es schöns u ungerhautsams Jubiläum uf d Bei chönne z stelle, wo vorauem öich Mitglieder no chli i Erinnerung wird bliebe.

E witere Bschluss vor letscht HV isch gsi, dass sich dr Verein e fahrbare Holzbachofe aschafft. Dä hi mir bir Firma Roth, z Wysachen bstellt u letscht Herbst bereits chönne abhole.

Mir Vorstandsroue hi das geniale Gfährt de o scho teschte u si dr Ueberzügig, dass das e sehr gueti Investition isch. Mir hi e Mietvertrag usgearbeitet, so dass me dä Ofen ab sofort chönnt miete.

Dr Defibrillator, wo mir üs ja o a de Chöschte beteilige, het dr Samariterverein afangs Jahr bir Turnhalle montiert.

Was im vergangne Kursjahr so gloffe isch, wärdet dir no vo de Kursverantwortleche ghöre.

So wett i mi zum Schluss bi öich aune bedanke, wo üse Verein ungerstütze, mitmache u mithälfe.

Will genau dir Mitglieder machets schliesslich us, dass mir uf

50 Jahr Gemeinnütziger Frauenverein Zäziwil und Umgebung, chö zrüg luege!

Renate Nussbaum

